

**Uunga siunnersuut: Meeqqanik pinerliisimanginnermut uppersaatinik
piumasaqaateqartussaataaneq pillugu Inatsisartut inatsisaata
allanngortinneqarnissaanut siunnersuut.
(atuuffiata annertusinera)**

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu
Naalackersuisunut ilaasortaq)

Aappassaaneerpeqarnera

Naalackersuisut sinnerlugit maanna meeqqanik pinerliisimanginnermut uppersaatinik
piumasaqartussaataaneq pillugu Inatsisartut inatsisaata allanngortinneqarnissaanut
siunnersuut aappassaaneerpeqartussanngorlugu saqqummiutissavara, oqaatigissavaralu assut
nuannaarutigakku siunnersuut tapersorneqarmat.

Aamma Inatsisinut ataatsimiititaliaq qutsavigissavara isumaliutissiisummut
saqqummiussaanut, ataatsimiititaliap isumaqatigiilluni erseqqissaasoqarnissaanut
allannguutissatut siunnersuuteqarluni siunnersuut akuersissutigineqartussatut
inassutigimmagu. Naalackersuisut allannguutissatut siunnersuut tunngavilerluakkatut
nalilerpaat, taamaattumillu ilalersinnaallugu.

Inatsisinut ataatsimiititaliap peqqissaartumik nassuiarsimavaa meeqqanik
pinerliisimanginnermut uppersaatiptu atuuffissaa sutigullu killeqarnera, tamatumunngalu
naggasiullugu oqaatigisimallugu: ”Naak 15-18-inik ukiullit inunnit paarsisuminnit
kinguaassiuutitigut pinerlineqannginnissamut illersorneqarnissaat
pinerluuteqarsimanginnermik uppersaatinut ”nalinginnaasunut” maleruagassat malillugit
pisinnaagaluartoq meeqqanik pinerliisimanginnermut uppersaatinut maleruagassat assingit
malillugit taamatut illersuinissaq isumagineqarsinnaappat naapertuunnerussagaluartoq
Inatsisinut Ataatsimiititaliaq isumaqarpoq.” Ataatsimiititaliap tamatumunnga ilaliullugu
nalunaarppaa, ataatsimiititaliap Folketingip Inatsiseqarnermut Ataatsimiititaliaanut
ajornartorsuutit pineqartut malugeqquniarai. Naalackersuisut tamanna tusaatissatut tiguaat,
tusarusussallugulu Folketingip Inatsiseqarnermut ataatsimiititaliaata tamatumunnga akissutaa.

Inatsisinut ataatsimiititaliap tamatuma saniatigut Naalackersuisunut kaammattuutigaa
isumaliutigeqqullugu inatsimmi piunasaqaataasunut tunngatillugu paasisitsiniaaneq
annertusisariaqannginnersoq, aammalu inatsisip malinneqarnissaanut tunngavissat
naammannersut. Ilisimatitsissutigineqarsinnaavoq ilitersuutissanik suliaqartoqareermat,
aammalu meeqqanik pinerliisimanginnermut uppersaammik piniartarnermut tunngasumik
paasisutissat ilitersuutitaqareermata. Naalackersuisut pisortani atorfinitsitsuusartut
oqaloqatiginiarppaat, tamatumani aamma kommunit, ingerlatsiviit peqatigiiffiillu,

oqallisiginiarlugu qanoq suliniuteqarnikkut paasisitsiniaaneq suli
pitsaanerulersinneqarsinnaanersoq, qanoq aqqissuussinikkut inatsisip malinneqarnissaa
qularnaanerulersinneqarsinnaanersoq.

Taamatut oqaaseqarlunga Naalackersuisut sinnerlugit inassutigissavara siunnersuut
ataatsimiititaliamit allannguutissatut siunnersuutaasut ilanngullugit taamatut isikkoqarluni
pingajussaaneerneqarnissaminut ingerlatseqqinneqassasoq.